



Tratg precis e bain: Ils tschintg tiradurs da Tumeagl Hansruedi Giger, Hermann Sgier, Urs Nau-  
li, Carl Frischknecht e Dirk Frischknecht (da san.).

FOTO G. N. STGIER

# Laax-Falera en il final

## Tir da gruppas

DA GION NUTEGN STGIER / ANR

■ **Las trais prerundas svizas dal tir da gruppas èn a fin. En il champ D èn sa qualifitgadas trais gruppas grischunas per il final a Turitg ed ina da quellas è quella da Laax-Falera. Persuenter n'èn naginas gruppas grischunas da la partida en il champ A tar l'occurrènz finala.** Sajettà la terza e davosa runda svizra en il champ D, la categoria da l'arma militara, han anc otg gruppas da noss chantun e suenter quella restan anc trais en la concurrenz naziunala. A fin è quella per las tschintg suandantas gruppas: Bregaglia, il campion grischun 2014, che ha «be» fatg 677 puncts, Sent, il finalist svizzer da l'onn 2015 cun 674 puncts e lura er la gruppa da Scharans che ha terminà la concurrenz cun far 662 puncts. Disfortuna han cunzunt già las ulteriuras duas gruppas Rodels e Versomi cun crudar or cun buns resultats. La gruppa da la Tumeleastga ha tuttina fatg 690 puncts e malgrà quella minada è la concurrenz stada a fin cun sajettar ils concurrents anc pli precis. Er ils tschintg tiradurs da la Val Stussavgia han tratg cun 684

puncts in resultat excellent che ha dentant tuttina na tanschi per sa qualifitgar per il final svizzer a l'entschatta da settember a Turitg.

### Tumeagl danovamain cun in resultat da vaglia

Sa qualifitgada per il grond final naziunal e quai en moda suverana è la gruppa da Tumeagl. En la segunda runda svizra avevan ils tschintg tiradurs sajettà 705 puncts ed en la terza e davosa runda naziunala schizunt 710 puncts. Ina prestaziun excellenta ed a medem temp er il segund meglier resultat svizzer en quella runda decisiva. Senza dubi tutgan els a Turitg tar ils favorits per turnar a chasa cun ina medaglia, sche betg sco campions svizzers. Da la partida a l'entschatta da settember a «l'Albigsütli» a Turitg vegn er ad esser la gruppa da Laax-Falera, ella che ha tratg en la terza runda svizra 687 puncts. Per ils tschintg tiradurs da quels dus lieus è la qualificaziun per il final svizzer segir in success. Danovamain en la concurrenz finala sco gia il 2015 è la gruppa da Tavau ch'è sa qualifitgada per il final grazia a ses 685 puncts.